

Blers «dieschs» per igls organisatours

Gion Nutegn Stgier/FMR

L'amprema da tschintg fegns d'emda dalla Festa federala da teir a Rona ed a Crappa Naira è gio passada. Tiradours e tiradouras ple tgi cuntaints e nigns problems cun la tecnica. Participants e participantas on pernotto an Surses ed er an Val Alvra.

Da venderde passo anfignen dumengia vers seira èn er nias tratgs a Rona ed a Crappa Naira ples stetgs dalla pi gronda occurrenza da sport 2026 an Svizra, la Festa federala da teir. Sen tots dus stands da teir è sto bler travagl, igl èn nias sagettos bungs resultats e tiradours e tiradouras èn stots cuntaints cun l'organisaziun a Rona ed a Crappa Naira. Ludada è alloura er neida la hospitalitad digls organisatours e dallas organisatouras e digls blers voluntaris e voluntarias.

Not Netzer, igl president digl comite d'organisaziun local a Rona fò an tots gros ena bilantscha positiva digls amprems deis dalla Festa federala da teir 2026. El dei: «Igl participants e las participantas on galdia da trer lour program sen en stand pi pitschen noua tgi tot è pi famigliar.» Angal cumpliments vegia el retschet, chegl è er detg Hardi Gruber, tgi stat agl timung digl comite d'organisaziun local a Crappa Naira.

«On parle français»

Igl treis deis tg'è nia sagetto a Rona ed a Crappa Naira ins ò ple u manc angal santia a discorrer franzos. Dialect bernese è alloura er nia discurrenza cunzont a Crappa Naira, dantant tgi a Rona è durant la davosa fegn d'emda nia discurrenza er taling. La raschung è tgi la «Societad tiratori Biaschesi Biasca» ò sagetto igl program da teir a Rona. Cutier ò l'uniun gia aint igl Hotel Aves a Savognin. Er sagetto a Rona sen chel stand on plessas uniuns dalla Romandie, scu per exaimpel «Villars-sous-Yens Tir sportif Le Chaney» e l'uniun «Sorens Société de tir».

Scu gio dalla Festa cantunala da teir igl 2012 aint igl Grischun Central ò la Societad da teir Maladers er sagetto la davosa fegn d'emda a Rona. Erika Loretz, commembra da chella uniun ò detg: «Nous vagn sapientivamaintg tscharnia igl stand da teir tg'è igl pi gliunsch davent da Coira, chegl per tgi possans star sur notg e galdeir an cuminanza la festa.» Er igls tiradours e las tiradouras dallas uniuns da teir dalla Svizra franzosa on detg tg'ins vegia lia sagettar a Rona ed a Crappa Naira er per star ainten la regiun sur notg e per aveir legher e buna cumpagneia.



Igl tiradours e las tiradouras da Malader on sagetto lour program a Rona e pernotto è nia a Savognin aint igl BB La Tgamona.

(200) Meisterschaft liegend 🏆										Standardgewehr	
10	10	10*	10	9	10*	10	10	10*	10	99	
10	9	9	10*	8	9	9	9	9	10*	92	
9	9	8	9	10	9	10*	9	9	10	92	
10	10	9	10	9	9	10	9	10	9	95	
10*	10	10	10	9	9	10	9	9	9	95	
10	10*	9	10	9	10	10	9	10	10*	97	
										570	

Tratgs èn nias a Rona bungs resultats. Sagetto ferm ò per exaimpel Linard Jäger da Cunter e fatg cun 60 schozs sen la scheba da diesch 570 puncts.

Fotos Gion Nutegn Stgier

Da Beiva anfignen Churwalden

Or vista turistica è l'occurrenza da teir nazionala sa tgapescha er interessanta. Chegl er schi dat aint igl Grischun Central turistichers tgi vardan la festa per en event tgi porta pac ed ena occurrenza tgi atteira strusch aspectatours (durant en meis vignan igls 36 000 tiradours e tiradouras accompagneas da radond 100 000 persungas).

Realitad è tgi la davosa fegn d'emda on uniuns da teir pernotto betg angal en de, mabagn er ples, chegl a Savognin, Cunter, Casti, Lantsch, Lai, Parpan, Valbella ed a Churwalden.

Ainten la regiun da vacanzas da Lai on cunzont er pernotto tiradours e tiradouras tg'on sagetto a Coira u er a Crappa Naira e schizont a Rona. Stos sur notg èn participants e participantas per exaimpel er a Rona ainten dus abitaziuns, agl campadi ed er ainten ena tgesa da colonias. Bler travagl durant la davosa fegn d'emda ò er gia igl restaurant digl campadi a Rona ed er a Savognin, Cunter, Casti ed a Lai e conturn. Tot piglia on igls tiradours e las tiradouras betg angal ludo l'organisaziun e scu tigl teir attribua agls organisatours blers «dieschs», mabagn er agls hotels noua tg'els on pernotto.